

Reglur um starfsemi leikskóla í Sveitarfélaginu Hornafirði

Leikskólar Sveitarfélagsins Hornafjarðar starfa samkvæmt lögum um leikskóla nr. 90/2008, reglugerð um starfsumhverfi leikskóla nr. 655/2009, Aðalnámskrá leikskóla frá árinu 2011 og menntastefnu sveitarfélagsins. Leikskólastarf er rekið í leikskólunum Sjónarhóli á Höfn og Lambhaga í Hofgarði. Þessar reglur gilda fyrir báða skólana. Í viðauka eru sett fram sérákvæði um leikskólann Lambhaga.

Fyrsta skólastigið

Leikskólinn er fyrsta skólastig barnsins. Að vera í leikskóla er ákveðinn áfangi á menntabrautinni. Leikskólastarfið miðast við samfellda viðveru barns alla virka daga vikunnar. Því er mikilvægt að barn mæti vel og tímanlega til að taka þátt í leik og starfi.

Umsókn og innritun

Í leikskólum sveitarfélagsins dvelja börn á aldrinum 1 – 6 ára. Í leikskólanum Sjónarhóli er sveigjanleg deildarskipting. Börnum er skipt niður á deildir eftir aðstæðum hverju sinni og tekið er tillit til aldurs og fjölda barna í árgangi, fjölda starfsmanna og plássí á deildum. Sótt er um leikskóladvöl í íbúagátt sveitarfélagsins á heimasíðunni; www.hornafjordur.is.

Skilyrði fyrir leikskóladvöl- aldursmörk og umsóknir

- Skilyrði fyrir leikskóladvöl barns er að það eigi lögheimili í sveitarfélaginu og að foreldrar séu ekki í vanskilum við sveitarfélagið vegna leikskólagjalda. Fjármálasviði sveitarfélagsins er heimilt að gera samkomulag við foreldra um eldri skuldir svo að yngra barn þeirra geti hafið leikskólagöngu, en í því felst m.a. að heimilt er að segja upp leikskóladvöl barns verði ekki staðið við samkomulag um greiðslu.
- Foreldrar sem hyggjast flytja í sveitarfélagið geta sótt um leikskóladvöl en barn fær ekki úthlutað dvöl fyrr en lögheimili hefur verið flutt og skulu foreldrar tilkynna skólaskrifstofu sérstaklega um lögheimilisflutninginn. Geti foreldrar staðfest fyrirhugaðan flutning geta börn fengið úthlutað plássí að því tilskyldu að búið sé að flytja lögheimili þegar barn á að hefja leikskólagönguna.
- Hægt er að sækja um leikskóladvöl vegna tímabundinnar dvalar barna með lögheimili í öðrum sveitarfélögum og er þá farið eftir viðmiðunarreglum Sambands íslenskra sveitarfélaga vegna leikskóladvalar barna utan lögheimilissveitarfélags, <https://www.samband.is/verkefning/fraedslumal/leikskoli/vidmidunarreglur-vegna-leikskoladvalar-utan-logheimilissveitarfelags/>
- Hægt er að sækja um leikskóladvöl þegar börn hafa náð 9 mánaða aldri. Öll börn eins árs og eldri eiga kost á leikskóladvöl þegar plássí eru laus.
- Börn eru innrituð í aldursröð, þau elstu fyrst, að því tilskyldu að plássí séu laus á viðkomandi deild. Forgang hafa:
 1. Börn með fötlun og skal þá greining vera í ferli eða henni lokið.
 2. Langveik börn eða börn sem búa við alvarleg veikindi eða fötlun hjá fjölskyldumeðlim. Vottorð frá lækni eða öðrum þar til bærum aðilum skal fylgja umsókn.
 3. Börn starfsmanna viðkomandi leikskóla svo framarlega sem foreldrar séu í skilum við sveitarfélagið sbr. skilyrði fyrir leikskóladvöl.

Beiðni um forgang samkvæmt liðum 1 og 2 skal berast sviðsstjóra. Sviðsstjóri, leikskólastjóri og aðstoðarleikskólastjóri fara yfir og meta umsóknir um forgang.

Úthlutun og uppsögn leikskólarýma - upplýsingagjöf

Aðalinnritun barna fer fram í apríl/maí og þá er úthlutað leikskólarýmum þeirra barna sem útskrifast. Leikskóladvöl barna hefst að jafnaði á tímabilinu ágúst til september með fyrirvara um laus pláss. Lausum plássum, eftir aðalinntöku, er úthlutað jafnt og þétt eftir innritunarreglum.

Leikskóladvöl barna, yngri en tveggja ára, er úthlutað eftir dagsetningu umsóknar og reglum um forgang.

- Þegar barni hefur verið úthlutað leikskóladvöl tilkynnir leikskólastjóri/deildarstjóri foreldrum hvenær barnið getur hafið skólagöngu sína.
- Barn skal hefja leikskólagöngu eigi síðar en tveimur mánuðum eftir að leikskóladvöl hefur verið úthlutað. Hefji barnið ekki leikskólagöngu innan þess tíma er plássinu úthlutað til þess barns sem næst er á biðlista. Sé pláss afþakkað þarf viðkomandi í öllum tilvikum að senda inn nýja umsókn.
- Í viðtali við upphaf leikskóladvallar barns er farið yfir reglur um leikskóla og foreldrahandbók. Foreldrar staðfesta með undirritun sinni á þar til gert viðtalsblað að þeir hafi kynnt sér gjaldskrá og reglur leikskólanna í sveitarfélaginu og skuldbinda sig til að hlíta þeim eins og þær eru á hverjum tíma.
- Uppsögn eða ósk um breytingar á skólatíma skal miða við 20. hvers mánaðar. Uppsagnar- eða breytingafrestur miðast við tvær vikur. Uppsögn skal vera skrifleg og skilast til leikskólastjóra.
- Þegar barn útskrifast þarf að útfylla uppsagnareyðublað og skila fyrir 20. apríl.

Opnunartími – skipulagsdagar og sumarleyfi leikskóla

Árlegur starfstími leikskólanna er ellefu mánuðir. Á tímabilinu júlí – ágúst eru skólarnir lokaðir samfellt í 20 virka daga. Skólastarf eftir sumarfrí hefst á skipulagsdögum hjá starfsmönnum.

- Leikskólarnir starfa 5 virka daga í viku. Sjórnarhóll starfar frá klukkan 7:45 – 16:15, þar er hægt er að velja upphaf skóladags kl. 08 eða kl. 09 og börn geta dvalið þar í 4–8½ klukkustund. Leikskólar eru lokaðir sex daga á ári vegna skipulags- og námskeiðsdaga. Þessir dagar eru skipulagðir í samvinnu við grunnskólann eins og kostur er. Leikskólar eru lokaðir 24. og 31. desember. Leikskólagjöld lækka ekki vegna þessa.
- Foreldrum ber að virða þann tíma sem barni er úthlutað en hann miðast við að barn komi og sé sótt á þeim tíma sem um ræðir. Sé barn með skólatíma t.d. frá kl. 8:00 – 16:00 en mætir oftast 5-10 mínútur fyrir eða sækir barn 5 – 10 mínútur yfir heila tímann, þá greiða foreldrar fyrir viðbótar korter.
- Komi foreldrar ítrekað of seint að sækja barn sitt miðað við skilgreindan skólatíma, skulu þeir greiða fyrir það sem svarar einni klukkustund samkvæmt gjaldskrá, að undangenginni aðvörun. Foreldrar fá skriflega aðvörun eftir að hafa komið þrisvar sinnum of seint að sækja barn og aukagjaldi verður bætt við næsta innheimtuseðil.

Leikskólagjöld og afsláttur

Sveitarfélagið Hornafjörður greiðir yfir 85% kostnaðar við dvöl barna í leikskólum þess. Foreldrar greiða hinn hluta kostnaðarins í hlutfalli við þann tíma sem börn þeirra dvelja í leikskólanum, svokölluð dvalargjöld. Einnig greiða þeir hluta kostnaðar við þær máltíðir sem börn fá í leikskólum, svokölluð fæðisgjöld. Dvalargjöld og fæðisgjöld nefnast einu nafni leikskólagjöld. Á innheimtuseðli kemur fram kostnaður vegna skólatíma annars vegar og fæðis hins vegar. Greiða skal fyrir allt fæði, sem fram er borið á skólatíma hvers barns.

- Fyrsti innheimtuseðill miðast við þann dag sem barn hefur verið boðað í aðlögun.
- Veittur er systkinaafsláttur með eftirfarandi hætti: 50% af grunngjaldi með öðru barni og 100% af grunngjaldi með börnum umfram tvö.
- Einstæðir foreldrar fá 30 % afslátt af leikskólagjaldi en greiða hins vegar fullt fyrir fæði barna sinna.
- Óski foreldrar eftir því að taka barn sitt úr leikskóla um skeið verður að greiða öll skólagjöld til að tryggt sé að barnið haldi plássinu.
- Mögulegt er að sækja um undanþágu frá greiðslu fæðis ef barn er utan leikskóla samfelld í 10 skóladaga eða lengur. Greiðsluseðlar eru sendir út fyrirfram þannig að foreldrar verða að láta vita fyrir 20. hvers mánaðar ef börn þeirra eiga ekki að vera í mat á næsta tímabili.
- Komi upp alvarleg veikindi hjá börnum um lengri tíma er hægt að sækja um niðurfellingu leikskólagjalda til skólaskrifstofu.

Foreldrum ber að tilkynna leikskólastjóra um breytingar á högum sínum s.s.breytt heimilisfang, símanúmer, breytingu á vinnustað foreldris og hjúskaparstöðu.

Innheimta leikskólagjalda

- Leikskólagjöld eru innheimt mánaðarlega fyrirfram. Gjald dagi er í upphafi mánaðar og eindagi 15 dögum síðar. Leikskólagjöld eru ekki innheimt þann tíma sem leikskólarnir eru lokaðir vegna sumarleyfa.
- Séu gjöld ógreidd 5 dögum eftir eindaga eru kröfur sendar til innheimtufyrirtækis með tilheyrandi kostnaði og greiðandi fær senda innheimtuviaðvörun. Séu gjöld enn ógreidd 15 dögum eftir eindaga er skuldara sent fyrsta innheimtubríf, annað bréf 25 dögum eftir eindaga og þriðja bréf 35 dögum eftir eindaga (lokaviðvörun).
- Veittur er 15 daga frestur til greiðslu eða samninga frá dagsetningu lokaviðvörunar.
- Ef ofangreindar aðgerðir bera ekki árangur er krafa send í löginnheimtu.

Veikindi og smithætta

- Óheimilt er að hafa veikt barn í leikskóla. Börn skulu vera minnst 1–2 daga heima hitalaus eftir veikindi. Við ákvörðun um inniveru eftir veikindi skal farið eftir reglum viðkomandi leikskóla.
- Fáí barn smitandi sjúkdóm, s.s. hlaupabólu, fimmtu veikina eða annað sem smitast á milli manna s.s. njálg, lús, kossageit, augnsýkingu, verður það að dvelja heima þar til smithætta er liðin hjá. Lúsasmit ber að tilkynna til leikskóla og heilsugæslu og njálg til leikskóla.
- Greinist barn með óþol, ofnæmi, astma eða annað sem krefst sérstakrar meðhöndlunar í leikskóla skal skila læknisvottorði því til staðfestingar.

- Foreldrarskulu láta starfsfólk vita ef barn kemur ekki í leikskólann vegna veikinda eða einhvers annars.

Viðauki

Gildir fyrir leikskólann Lambhaga í Hofgarði.

- Leikskólinn Lambhagi starfar frá klukkan 8:30-16:30 og börn geta dvalið þar 4-8 klukkustundir.
- Leikskólinn fylgir skóladagatali Grunnskólans í Hofgarði og er því lokaður yfir jól og páska eins og grunnskólinn. Leikskólagjöld lækka þá mánuði í samræmi við lokun.
- Leikskólinn fær úthlutað þremur skipulags- og námskeiðsdögum á ári og skal einn af þeim unninn eftir sumarfrí áður en börnin byrja í skólanum.

24. september 2021
Matthildur Ásmundardóttir
bæjarstjóri